

LETTRE DE  
CONSOLATION  
ENVOYÉE  
A MADAME  
DE  
CHASTILLON,  
SVR LA MORT DE  
MONSIEVR DE  
CHASTILLON.



A PARIS,  
Chez I E A N B R V N E T, rue Neuve S. Louys,  
au Canon Royal, près le Palais.

---

M. DC. XLIX.



LETTER DE  
CONSOLATION


FAVORABLE  
A M A D A M E

CHASTILLON

LA MORT

CHASTILLON

CHASTILLON



CHASTILLON  
LA MORT

CHASTILLON



**LETTRE DE CONSOLATION ENVOYÉE**  
*à Madame de Chastillon, sur la mort de*  
*Monsieur de Chastillon.*



**A D A M E,**

Quoy qu'il semble que ie vous escriue vn peu tard, ie n'ay pas creu toutefois vous deuoir plustost escrire, puis qu'il est dangereux de porter les mains sur des playes quand elles sont encore fraïches ; qu'il est difficile d'arrester l'eau dans la source, & que vostre tristesse peut estre appellée vn rejetton de la iustice, & vne debte que l'amour paye à la vertu. Ceux qui deffendoient à l'ame de faire vne hostesse de la douleur, & qui ne vouloient pas même qu'elle l'a reçeut comme passagere, ont honoré la Philosophie aux despens de la nature, & se sont opiniastrez à composer le temperament des Sages de celuy des Ladres. La tristesse n'est pas tousiours effroyable, elle a ses charmes comme la ioye ; & si les larmes qui coulerent autrefois sur vn beau visage, trouuerent vn Roy qui brula pour elles, il est certain qu'on peut pleurer de bonne grace. La verité nous enseigne par la bouche de Salomon qu'il y a des temps pour pleurer: Il n'est pas iusques à S. Paul qui n'en appreuue l'usage, iusques là même qu'il veut qu'on verse des pleurs avec ceux qui en respindent; & le Medecin qui entreprendroit de guerir vne ame affligée par vn remede contraire, l'obligeroit sans doute à

A ij



vne ordonnance plus cruelle que la maladie. C'est pour  
 cette raison, M A D A M E, que j'ay laissé passer les pre-  
 miers accez de vostre douleur, & que ie n'ay ozé vous  
 entretenir d'une perte qui est deuenüe publique, qui ne  
 peut estre indifferente qu'aux Pensionnaires d'Espagne,  
 ou aux stupides, & dont le ressouvenir ne nous permettra  
 iamais de gouster vne ioye entiere. Apres auoir eu quel-  
 que part aux bonnes graces de feu Monsieur de Chastil-  
 lon, il y auroit de quoy faire mon procez, & de quoy ren-  
 dre mon ingratitude criminelle, si ie ne prenois part a vo-  
 stre mal-heur, & ie serois digne de mort, si ie ne m'arre-  
 stois avec vous à plaindre la sienne. Il est vray, MADAME  
 que la raison qui nous oblige de soupirer diuersement  
 dans cette rencontre, ne nous permet pas de souspirer  
 toute nostre vie; que les regrets ont leurs bornes comme  
 ils ont leurs causes; qu'ils ne commencent pas aux con-  
 ditions de ne point finir, & que la douleur est tousiours  
 cruelle quand elle est constante. Quoy que les loix des  
 Romains ordonnassent aux femmes, vn dueil de dix mois  
 pour la mort de leurs marys: il ne faut pas s'imaginer  
 qu'elles leurs commandassét de les pleurer si long temps  
 ce n'estoit que pour les empêcher de les pleurer dauanta-  
 ge, & l'Escripture qui doit estre la regle de vostre salut & du  
 mien, à des circonstances plus glorieuses, & des bornes  
 de moindre estendue. Vous avez perdu au milieu de votre  
 ieunesse vn homme qui estoit à peine venu au bout de la  
 sienne, mais ce comique dont l'Apostre n'a pas dedaigné  
 de canonier le tesmoignage, nous enseigne que les per-  
 sonnes qui sont bien avec les Dieux n'ont pas accoustumé  
 de blanchir; & quand Homere & l'Histoire de tous les sie-  
 cles, ne nous auroient point appris que les Heros ne meu-  
 rent point vieux, vous estes trop sçauante pour ignorer qu'il

n y a



n'y à point d'ordre dans la mort, comme il y en a dans la naissance. Peut estre que cet accident ne laisse pas de vous troubler, pour ce que le Christianisme, qui perfectionne la nature, ne s'est point encore aduisé de la détruire. Il est vray, M A D A M E, & ie n'appellerois point de cet Oracle, si ie n'estois point aussi pleinement persuadé de l'exemple mesme de la patience, que la vie est vne guerre perpetuelle; & que nostre mal doit estre vne partie de nostre consolation, puis qu'il n'est rien plus assure que cette maxime, dont vn frere de l'Eglise, veut que Sainct Pierre soit Autheur, que l'ame affligée est proche de Dieu. Vostre verge ma consolé Seigneur, disoit le Prophete, comme s'il en eut pris le coup pour vne faueur particuliere, & qu'on ne peut monter à la gloire que par la souffrance. Outre que les lettres Sainctes confondent bien souuent par vn melange tres heureux, l'affliction avec les visites de Dieu, vn Theologien n'a pas eu mauuaise grace de dire que les vertus estoient semblables aux Estoiles, apres auoir fait voir le rapport qu'il y a de l'ame au Ciel, de la foy à la Lune, & de l'entendement au Soleil, pour ce que les vertus semblent tirer leur plus grand eclat de l'aduersité, comme les Estoiles ne brillent point d'auantage que quand la nuit est obscure. Le Pilote n'a iamais plus besoin d'adresse que dans la tourmente: Le Triomphe est le plus beau fruct du combat, & ce n'estoit ny aux plus beaux ny aux plus forts que la couronne estoit reseruée aux ieux Olympiques, comme le remarque le maistre des Philosophes, mais à ceux de qui le courage auoit esté le plus grand & le plus opiniâtre dans la lutte. Sainct Basile veut à ce propos que les iustes soient considerez par l'affliction qui les exerce, comme des Athletes fameux par



les redoutables ennemis qu'ils ont à combattre, & l'un des premiers Saints d'Aquitaine, assure mesme que les disgraces qui nous arriuent, sont moins les ouurages de la iustice de Dieu que de sa misericorde. Ces veritez sont veritablement rudes & terribles à qui n'en considere pas la suite, mais il en est comme de ces foudres que les anciens appelloient Auxiliaires, dont l'approche auoit quelque chose d'effroyable, & dont l'effet apportoit tousiours quelque bien. Vous ne treuuez pas estrange s'il vous plaist, M A D A M E, que i'employe ces exemples pour vous rassurer, & que i'introduise chez vous des Sages, des Roys & des Saints pour vous consoler, & pour vous remettre. Je ne me sens ny assez fort ny assez hardy pour entreprendre vn si grand chef d'œuvre; & si ie vous conseille de vous seruir d'eux, c'est qu'ils m'ont soulagez dans le mesme mal qui vous presse, qu'ils ont des remedes pour toutes les maladies, & qu'il est aysé de faire des cures à ceux qui font ordinairement des miracles. Les Aphorismes d'Hippocrate, & les preceptes de Zenon ne sont point capables d'un si grand effort; toute l'escole de la Medecine, & de la Philosophie ny peut suffire: Il faut que le Christianisme fasse l'office de la Morale Payenne en cet endroict, que la nature rende cette defference à la Grace, & que Dieu supplée à la foiblesse des hommes. Cette foy du Centenier fut merueilleuse, quand il dit à Iesus-Christ, qu'il prononcât vne parole, & que son ame seroit guerie; l'effet suiuit son intention, & si vous auez la mesme foy, vous n'auetz plus desia de souhait à faire. S. Iean nous aduertit de ne point perdre courage dans l'affliction. S. Pierre dit qu'elle est l'espreuue de la foy, que celle cy nous empesche de succomber sous ce qui nous tète, & S. Mathieu nous assure, que c'est par elle encore,



que nous obtenons toutes nos demandes. Apres cette verité, vos larmes pouroient estre criminelles, si vous faissiez quelque scrupule de les essuyer, & de les tarir, & si vous me le pardonnez, j'ose dire que vous ne meriteriez pas qu'on vous plaignt, si vous ne cessiez de vous plaindre. A parler naturellement, vous souspirez peut estre, M A D A M E, qu'un si mechant homme que le Cardinal Mazarin, vous ayt fait perdre un si genereux mary, & c'est ce qui n'empesche aussi tout à fait de me consoler d'une pieté qui est si grande, & qui ne peut encore manquer d'estre suivie de plusieurs autres. Il est de ceux dont parle Salomon dans ses Prouerbes, qui ne dorment qu'apres avoir fait quelque mal; qui sont en abomination à ceux qui ont de l'amour pour la iustice, & qui vivent comme des Lions rougissans, & comme des Ours qui cherchent leur proye. Il estoit presque impossible que ce Politique pernicieux qui a corrompu la plus grande partie du Conseil, inspirât des sentimens plus paisibles & plus nobles, & qu'une querelle si detestable ne deuint fameuse par quelque fatale aduantage, depuis qu'il est devenu l'Oracle des ennemis du Roy & de son Estat, & qu'il n'a pas moins fait que le Basilic qui fait taire tous les autres Serpens quand il siffle. Vous en serez bien tost vangée quoy qu'il arriue, puis qu'enfin la pierre tombe sur celuy la mesme qui la roule, come dit le Sage, & que Dieu combat avec nous, comme il combattoit autrefois avec les Israélites. Mais ie passe d'un meurtrier & d'un sacrilege à une personne toute vertueuse, & de la tyrannie trióphante à l'innocence affligée; de peur qu'il ne me soit un iour reproché, d'auoir meslé le Saint avec le Prophane, & d'auoir fait aller de compagnie l'un des derniers môîtres de la Sicile, avec l'un des derniers miracles de nostre France.



Je reuiens donc à vous, MADAME, pour vous supplier  
 tres-humblement de me pardonner la hardiesse que j'ay  
 prise de vous consoler dans vne rencontre, ou la plus belle  
 eloquence doit estre quelquefois muette: avec cette fa-  
 ueur, j'auray pour le moins la gloire d'auoir esté le pre-  
 mier à vous faire voir mon ressentiment, & à vous asseurer  
 dans vne si triste conioncture, que ie seray toute ma vie.

**MADAME;**

Vostre très humble, &  
 très obeissant seruiteur;

B. D.